



## **Aatsitassarsiornermi avatangiisit pillugit malittarisassat 2019-2023**

Matumani pilersaarutitut tunngatillugu allakkiamut missingiutip imarai nunatsinni aatsitassarsiornermi avatangiisinut, pinngortitamut silallu pissusianut tunngatillugu immami nunamilu malittarisassiornissami ineriartortitsinermut anguniagassat. Allakkiap sinnerani avatangiisinut, pinngortitamut silallu pissusianut tunngasut ataatsimut taaneqartassapput “avatangiisit”. Pilersaarutitut tunngatillugu allakkiami eqqartorneqarput 2019-mit 2023-mut pisussat.

Allakkap ullua: 19-06-2019  
Suliaq nr. 2017 - 26137

Aatsitassanik Suliassaqarfinnut Avatangiisinut Aqutsisoqarfik tassaavoq Kalaallit Nunaanni aatsitassarsiornermi avatangiisinut tunngasut malittarisassiorneqarnissaannut allaffissornikkut oqartussaqaarfik. Avatangiisit, pinngortitap silallu qajassuunneqarnissaat pillugit malittarisassat Aatsitassanut inatsimmi aalajangersakkat malillugit sinaakkusersugaapput. Aatsitassanut inatsimmittaqaq allassimavoq naliliinerit aalajangiinerillu avatangiisinut tunngassuteqartut, ilisimatuussutsikkut arlaannulluunniit pituttorsimangitsumit/nit avatangiisinik suliaqarfiusumit/nit naliliinerit aalajangiinissamullu missingiutit tunngavigineqartassasut.

Postbox 1614  
3900 Nuuk

Oqa. (+299) 34 50 00

E-mail: eamra@nanoq.gl  
www.naalakkersuisut.gl

Pilersaarutitut tunngatillugu allakkiami uani ineriartortitsinermut anguniagassat Aarhus Universitetimi nunap iluani avatangiisinut nukissiuuteqarnermullu ilisimatusarfimmi Bioscience-mut tunngatillugu Institut-imi (DCE)-mi aamma Pinngortitaleriffimmi ilisimatuussutsikkut siunnersuisartut siunnersuutaat tunngavigalugit suliarineqarput. Taakkua saniatigut pilersaarutitut allakkiami nunat tamalaat akornanni sammisamut tunngatillugu periusersartagaat pitsaanerpaat isumassarsiorfigineqarput.

Ilisimatuussutsikkut siunnersuutit DCE-meersut Pinngortitaleriffimmeersullu allakkiamut uunga ilanngunneqarput.

- *Ilanngussaq: Aatsitassarsiornermi avatangiisit pillugit malittarisassiornissamut ilisimatuussutsikkut siunnersuutit piffissami pilersaarusiortiusumi 2019-2023*

## **Aatsitassarsiornermut pilersaarummi 2019-2023-mi avatangiisinut tunngasut**

Pilersaarummi anguniagaq pingaarneq tassaavoq Avatangiisinut Aqutsisoqarfiup anguniarneqartut ineriartortitsinermullu anguniagassat aqutugalugit, aatsitassarsiortut avatangiisit pingaartinnerullugit inissittassagaat, sapinngisamik siusissukkat pitsaasumillu. Avatangiisinut Aqutsisoqarfiup suliai suliffeqarfiit namminneerlutik akisussaaffigisaannut tapersiisuussapput, matumani avatangiisinut pitsaanerpaq anguniarlugu.

Pilersaarummi tunngavigineqarpoq aatsitassanut inatsimmi pingaarnertut anguniarneqartoq – aatsitassarsiornermi suliat tamarmik avatangiisit eqqarsaatigalugit akisussaassuseqartumik ingerlanneqarnissaat – nunallu tamalaat akornanni periuserineqartut pitsaasut assigalugit ingerlanneqassasut.

*Avatangiisit eqqarsaatigineqarlik – aallartittoqannginnerani matoreerneranilu*

Avatangiisinut inatsisit nutarterneqarsimasut aatsitassarsiortoqarneranilu pinngortitamik avatangiisinillu qajassuussinissamik pingaartitsisoqarnera pissutaallutik, Kalaallit Nunaat Issittumi nunanut allanut sanilliulluni siuarsimavoq. Inuiaqatigiittut aningaasarpasuit nukippasuillu ukiut tamaasa atortarpagut pinngortitap avatangiisillu pitsaasuunissaat anguniarlugu.

Avatangiisinut tunngasut aqulluarneqarnissaat anguniarlugu aatsitassanik misissuilluni aallartinnermi avatangiisit eqqarsaatigineqartarnissaat pisariaqarpoq.

Aallaqqaataaniit naammassinissaanut suliat tamarmik nunat tamalaat akornanni periuserineqartut pitsaasut tunngavigalugit ingerlanneqartassapput, nunatsinni pissutsit naleqqussarfigalugit – avatangiisinut periuseq pitsaanerpaaq teknikkilu pissarsiarineqarsinnaasoq pitsaanerpaaq atorlugit.



**Assitaliussaqaq 1:** Anguniarneqartut ineriartortitsinermilu anguniagassat aatsitassarsiornermi killiffigineqartartut assigiinngitsut tunngavigalugit inississugaapput: misissuineq misissueqqaartoqannginneralu sioqqullugit – misissuinermit piiaanermut ikaarsaarnermi – aatsitassanik piiasoqalerpat – matoreerpallu kingorna. Ammalortuliap qeqqaniittut tassaapput killiffinni tamani anguniarneqartut.

## **Killiffiit apequtaatinngit**

*Avatangiisinut ataatsimut sunniutaasartut - uumassuseqarfinnik tunngaveqartumik aqutseriaaseq*

Aatsitassarsiorneq assigiinngitsutigut inuussutissarsiutinit allanit allaaneruallaanngilaq. Uumassuseqarfinnik tunngaveqartumik aqutseriaaseqarnermi sumiiffiup aatsitassarsiornikkut allatigullu ataatsimut sunnerneqarnera isigineqartarpoq – tassa avatangiisinut ataatsimut sunniutaasartut.

Pinngortitamut avatangiisinullu aqutsisut suleqatigineqartariaqarput, avatangiisinut ataatsimut sunniutaasartut tamaasa isigalugit aqutseriaaseqassagaanni (uumassuseqarfinnik tunngaveqartumik aqutseriaaseq). Tassunga atatillugu anguniakkat ilagaat immikkut inatsisiliornikkut avatangiisinut tunngasunik malittarisassiornerup ineriartortinneqarnerata ingerlatiinnarnissaa (avatangiisinut inatsisit immikkoortut marluk; uuliamut gassimullu tunngatillugu avatangiisinut inatsit aamma aatsitassarsiornermut tunngatillugu avatangiisinut inatsit).

Piffissami pilersaarusiukkami aggersumi anguniakkat ukuupput:

1. Uuliamut, gassimut aatsitassanullu tunngatillugu immikkut inatsisiliorneq avatangiisit pillugit malittarisassanik imalimmik.
2. Aatsitassarsiornermi avatangiisinik malittarisassiorneq aamma pinngortitamut avatangiisinullu tunngasunut allanut malittarisassiorneq ataqatigiinnerulersinneqassapput uumassuseqarfinnik tunngaveqartumik aqutseriaaseqarnerulernissaq anguniarlugu.
3. Ilisimatusarneq aatsitassarsiornermut tunngasoq nukittorsassallugu inatsisillu issittumi pissutsinut naleqquttuunissaat anguniarlugu inunnik attaveqatigiinnut ilaanissaq.

*Ammasuuneq, suleqatigiinneq attaveqatigiinnerlu*

Aatsitassanik Suliassaqarfinnut Avatangiisinut Aqutsisoqarfiup aatsitassarsiornermi avatangiisinik malittarisassiornermigut anguniarpaa aatsitassanut inatsimmi allassimasoq, aatsitassarsiorneq avatangiisit eqqarsaatigalugit akisussaassuseqartumik ingerlanneqassasoq, nunallu tamalaat akornanni periuseq akuerineqarsimasoq pitsaanerpaaq atorlugu. Inatsimmilu anguniarneqarpoq aatsitassarsiornermi inuit najugaqartut peqataatinneqassasut ineriartortitsisoqarneranilu kikkut tamat akuutinneqassasut.

Aatsitassarsiornermi suliaqartut assigiinngitsut pitsaasumik aammalu ataqqeqatigiinnermik tunngaveqartumik suleqatigineqarnissaat Avatangiisinut Aqutsisoqarfimmit kissaatigineqarpoq.

Taamaattoqassappat pisariaqarpoq suleqatiginiakkat ammasumik, suliamut tunngasumik anguniagaqarfiusumillu oqaloqatigineqartarnissaat. Taamaattumik Avatangiisinut Aqutsisoqarfiup ammasuuneq, suleqatigiinneq attaveqaqatigiinnerlu anguniakkatut pingaartutut isigai.

Ammasuunissaq attaveqaqatigiinnerlu pisariaqarput, piffinni innuttaasut, piffinni pisortaqarfiit, soqutigisaqatigiit allallu aatsitassarsiortunut malinnaasinnaaniassammata isummersorlutillu. Taamatutaaq pingaaruteqarpoq aatsitassarsiortit ineriartortitsinermik suliaqarnissaannik periarfissilluassallugit, aatsitassanut inatsit tunngavigalugu, kiisalu piumasaqaatit anguneqarsinnaasut ineriartortitsinissamullu piumasaqaatit aqutugalugit.

Tassani suut piumasaqaataanersut nalunngereernissaat, aammalu malittarisassat najoqqutassallu ersarissuunissaat pingaaruteqarput.

Anguniakkat ukuupput:

4. Pitsaasumik najugaqartunillu peqataatitsilluni ineriartortitsineq, peqataanissamut piumasaqaatit pitsaasut atorlugit ammasuuneq, aammalu suleqatigiinneq attaveqaqatigiinnerlu.
5. Aatsitassarsiortunut pitsaasunik ineriartortitsinissamut piumasaqaateqarnissaq malittarisassat, ilitersuutit, najoqqutassat piumasaqaatillu ersarissarnerisigut. Aatsitassarsiortinermilu paasissutissat avatangiisinut tunngasut suut isertuussaasarnersut ersarissarnerisigut.
6. Avatangiisinik naliliinerit malittarisassallu avatangiisinut tunngasut suunerinik ilisimatusarneq tunngavigalugu paasissutissiineq sapinngisamik kikkut tamanit takuneqarsinnaasunngortinnissaat (ilisimatuussutsikkut siunnersuisartut suleqatigalugit).
7. 2009 sioqqullugu aatsitassarsiortinermi paasissutissat avatangiisinut pinngortitamullu tunngasut katersorlugit ingerlateqqillugillu, paasissutissallu nalunaarusiarineqarsimasut sapinngisamik tamanit takuneqarsinnaasunngortinnissaat.

### **Aatsitassarsiortinerup aallartinnginnerani**

*Sumiiffiit suliallu illersorneqarnissaminnut immikkut pisariaqartitsisut ersarissumik malittarisassiorneqarnissaat*

DCE-p Pinngortitaleriffiullu ilisimatuussutsikkut innersuussutaat tunngavigalugit sumiiffiillu immikkut pingaarutillit illersorneqarnissaannik anguniakkat tunngavigalugit, Aatsitassanik Suliassaqarfinnut Avatangiisinut Aqutsisoqarfiup iliussisatik ima pingaarnersiorpaat:

8. Immami sumiiffiit ilaasa uuliasiorfigineqannginnissaat:
  - a. Kitaani 75° N-ip avannaani imartat aamma tunumi 80° N-ip avannaani imartat
  - b. Pikialasorsuaq, Qaanaap Umimmaat Nunaatalu akornanniitqoq
  - c. Attup Uummannaata Avataa
  - d. Kangerittiip paava
  - e. Sinerissap malussarissusiata sumiiffimmut tassunga avatangiisitigut misissorneqarnera tunngavigalugu, sumiiffiup aatsitassarsiorfissatut tunniunneqarsimasup sinerissamut ungasissusissaata killilerneqarsinnaanera
  
9. Nunami immamilu aatsitassarsiornerni tamani uuliap kinertup (HFO) atorneqannginnissaa assartorneqannginnissaalu.

*Immami suliniuteqarnermi avatangiisinik naliliinernik pitsanngorsaaneq – nunamilu nunap ilaani tunngaviusunik misissuinerit*

Imartanut annertuunut suliniuteqarnermi avatangiisinik naliliinerit suliarineqarsimapput, kingornalu sumiiffiit taakku 1990-ikkunni uuliasiorfissatut ammaaneqarsimallutik. Aatsitassarsiortoqalinnginnerani avatangiisinut ilisimasat aamma pinngortitap pissusia sumiiffimmi annertuumi suliniuteqarnermi avatangiisinik naliliinermi qulaarneqartarput.

Avatangiisinik naliliinerit sumiiffimmi avatangiisit pillugit paasisaqarluarusuttunit innuttaasunit atuarneqarsinnaapput, imaluunniit malittarisassiornermi oqartussanit atorneqarsinnaallutik – suliffeqarfinniillu aatsitassanik misissuerusuttunit atorneqarsinnaallutik. Avatangiisinut naliliinerit tunngavigalugit pilersarusiornerup iluanittaaq ineriartortitsinissamut anguniakkat nutaat ilutigalugit piffiit ilaanni nunami tunuliaqutaasunik misissueqqissaarnerit ingerlanneqartalissapput, matumani aatsitassanik ujarlernissaq naatsorsuutigineqarluni.

Immami suliniuteqarnermi avatangiisinik naliliinernit ilisimasat katersat sapinngisamik annertunerpaamik pissarsiariuminarsarneqassapput.

Anguniakkat ukuupput:

10. Nunanut kangerlunnullu tunngaviusumik misissuinerit suliarineqassapput, suliarinerinilu inuit najugaqartut ilisimasaat atorneqassapput.
  
11. Sumiiffinnut imartalinnut suliniuteqarnermi avatangiisinik naliliinerit ingerlatiinnarnissaat annertusarnissaallu.

12. Suliniuteqarnermi avatangiisinik naliliinernit tunngaviumillu misissuinernit ilisimasat paasissutissallu sapinngisamik annertunerpaamik pissarsiariuminarsarnissaat.
13. Suliniuteqarnermi avatangiisinik naliliinerit pillugit nunat eqqatsinniittut oqaloqatiginissaasa siuarsarnissaat.

*Ilisimatusarnek nunallu tamalaat akornanni suleqatigiinneq tunngavigalugu ileqqunik, malittarisanik ilitsersuutinillu ineriartortitsineq*

Aatsitassarsiornermik suliaqartunut sapinngisamik ileqqunik avatangiisinut tunngasunik, malittarissanik ilitsersuutinillu ersarissunik peqarnissaq piffissaq ungasissoq eqqarsaatigalugu pilersarusiornermi suliaqartut pingaartinneqarpoq. Tassani aamma pineqarput pinngortitami nassaassaareersunut ujaqqanut radioaktiv-iusunut ileqqut, malitassat ilitsersuutinillu (NORM). Ineriartortitsinermit anguniakkat atorlugit avatangiisinut tunngatillugu teknologiit pitsaanerpaat pissarsiarineqarsinnaasut periutsillu pitsaanerpaat atorveqassapput. Aatsitassarsiornermit namminneq akisussaassuseqarlutik avatangiisinut pitsaanerpaamik kinguneqartussamik suliaqarnissaat Aatsitassanik Suliaqarfinnut Avatangiisinut Aqutsisoqarfiup tapersorsorpaat.

Anguniakkat ukuupput:

14. Avatangiisinut tunngatillugu malittarisanik ileqqunillu katalog-iliortoqarnissaa.
15. Ilitsersuutit nutarsartuarnissaat.
16. Annikitsumik aatsitassarsiornerlutik qinnuteqartunut, pisariaqartitaat malillugit, avatangiisinik naliliinissamut avatangiisinullu tunngatillugu piumasaqaatinut ilitsersuusiornissaq.
17. Aatsitassarsiornermit namminneq akisussaassuseqarlutik avatangiisinut pitsaanerpaamik kinguneqartussamik suliaqarnissaat tapersorsorlugu.

### **Killiffik: Aatsitassanik misissuinernit piiaanermut ikaarsaarnek**

*Nunami suliaqarniarnermi pilersaarutinik avatangiisit pillugit tusarniaanermik (SPAPT/MAP) ASN-imut ilanngussisoqarsinnaalissaaq*

Avatangiisit ajoquserneqarnissaat pinngitsoortinniarlugu iliuusissat (avatangiisinik sunniisinaanermut annikillisaaniarluni suliniutit) ASN-imi allasimasat sanaartorerup ingerlatsinerullu nalaani atuutsinneqarnissaasa qularnaarnissaat alaatsinaanneqarpoq.

Aatsitassarsiornerup iluani ingerlasussanik piareersaaneq aqutsinerlu (logistik) aningaasaqarnikkullu pissutsit pissutaallutik ASN-imik tamanut tusarniaanermi

suliniuummi sanaartorneqarnerata aallartinnissaanut ingerlatsisoqalernissaanullu piffissaq sivisusinnaasarpoq.

Nunami aatsitassarsiorniartunut ASN-imut najoqqutassat maanna *suliaqarniarnermi pilersaarutininik avatangiisit pillugit tusarniaanermik (SPAPT/MAP)* ilaneqarsinnaanngorput. Suliaqarniarnermi pilersaarutit aatsaat amerlasuutigut ASN akuerineqareersimatillugu naammassillugit suliarineqartarput, taamaammallu paasissutissanik nutaanik avatangiisinut tunngasunik saqqummiussisoqarsinnaasarpoq, tamanut tusarniutigineqartariaqartunik.

*SPAPT/MAP* ASN-imik nalunaarusiap akuerineqarsimasup iluaniissaaq. Avatangiisinut sunniutaasussanik naliliineq suli suliniuummut tamarmut atuutissaaq sunniutaasussanullu tamanut, Naalackersuisullu malitassiaat aatsitassanullu inatsimmi malittarisassat tunngavigalugit avatangiisinut annertuumik sunniuteqartussanut tamanut atuulluni.

ASN-imi piumasagaatinut tunngaviummut eqquutinngitsumik suliniuummi annertuumik allannguuteqartoqarpat, suli inatsisitugit piumasagaataavoq ASN-imik nutaamik suliaqarnissaq aallartissasoq.

Sulianut avatangiisinut annertunngitsumik taamaallaat sunniuteqartussanut *SPAPT/MAP* aallartinneqarsinnaavoq, allaffissornikkullu akuerisassaalluni.

### **Suliaqarniarnermi pilersaarutininik avatangiisit pillugit tusarniaanernut (SPAPT/MAP) malittarisassat**

Suliassat suunerinik allattukkat tuluttut, kalaallisut qallunaatullu allassimasut tunngavigalugit *Suliaqarniarnermi pilersaarutininik avatangiisit pillugit tusarniaanernit (SPAPT/MAP)* ingerlanneqartarput. Suliassat allattorsimaffiat sap.ak. 5-ni tamanut tusarniutigineqassaaq, kingornatigullu tusarniaaneq tunngavigalugu naalackersuinikkut itisiliiffiusumik suliffeqarfik nalunaarusiortarluni (hvidbog). Naalackersuinikkut itisiliiffiusumik nalunaarusiaq suliassallu allattorsimaffiat avatangiisinut oqartussanit allaffissornikkut akuerineqassapput, ilisimatuussutsikkut siunnersortit tusarniarneqareernerisigut. Akuersissut tuluttut, kalaallisut qallunaatullu allassimasoq tamanut saqqummiunneqassaaq.

Suliffeqarfiup suliaqarnermini pitsaaliuilluni iliuusissat akuersissummut atatillugu piumasagaatigineqartut tamaasa aallartillugillu naammassissavai.

Suliaqarniarnermi pilersaarutininik avatangiisit pillugit tusarniaanernit atorlugit innuttaasut periarfissinneqassapput, sanaartornermi ingerlatsinermilu suliniutit ataasiakkaat akuersissutigineqarnerinut malinnaanissaannut, tamakkulu ilaannikkooriartut ASN-imik akuersisoqareernerani ukiorpassuit qaangiutereersut pisarput. Sanaartukkat ilaasa ilusissaat ilaatigut piareereerneqarneratigut suliffeqarfiit *SPAPT/MAP*-imik suliaqarsinnaassapput.

Anguniakkat ukuupput:



18. Nunami aatsitassanik pïanernut ASN-inut najoqutassiat nutarternissaat ASN-illu iluani suliaqarniarnermi pilersaarutitik avatangiisit pillugit tusarniaanernik (*SPAPT/*MAP) suliaqartoqartarsinnaanera ilanngutissallugu.

Malitassani naliliinissamut najoqutassiornissaq qaqugukkut ima annertutigisumik avatangiisitik sunniisoqartiginersaq allaat nutaamik ASN-iliortoqartariaqarluni, imaluunniit qaqugukkut suliaqarniarnermi pilersaarutitik avatangiisit pillugit tusarniaaneq (*SPAPT /*MAP) naammassanersaq.

### **Killiffik: Aatsitassanik pïiaaneq aallartippat**

*Sumiiffimmi nunallu ilaani malitseqartitsineq avatangiisinillu nakkutiginninneq*

Aatsitassarsiornerup ingerlanerani malitseqartitsinissaq avatangiisinillu nakkutiginninnissaq eqqummaariffigineqarpoq, taamaalillutik avatangiisinut sunniutit siusinaartumik paasineqartarniassammata.

Manna tikillugu aatsitassarsiornermi suliffeqarfiit namminneerlutik akuersissuteqarfiusumi avatanngiisitik misissuisarput, oqartussallu ilassutitut oqartussaqaarfiusumik nakkutilliisarlutik. Taassuma saniatigut periarfissaasarpoq pïiaaffiup eqqaani nunap ilaani avatangiisitik nakkutiginninneq, tamannalu avatangiisinut oqartussanit suliarineqarlunilu akilerneqartassaaq. Malitseqartitsinermit avatangiisinillu nakkutiginninnermit innuttaasut eqqaani najugaqartut kikkut tamallumi sapinngisamik ilaatinneqarnissaat piffissaq ungasissoq eqqarsaatigalugu anguniagaavoq.

Anguniakkat ukuupput:

19. Akuersissuteqarfimmi taassumalu eqqaani nunap ilaanik avatangiisitik nakkutiginninnermit uumassuseqarfiup qanoq innera avatangiisinut oqartussanit misissorneqartarpoq. ’
20. Suliffeqarfiit iluminni avatangiisinut aqutseriaatsimik peqassapput, nunat tamalaat akornanni piumasaqaataasut malillugit nunamilu akuersissuteqarfiusumi namminneerlutik avatangiisitik misissuisassallutik.
21. Avatangiisinut oqartussat pïiaaffimmi avatangiisitik nakkutilliillutik misissuisassapput, akuersissuteqarfiusumilu suliffeqarfiit namminneerlutik misissuisarnerat nakkutigissallugu.
22. Malitseqartitsinermit avatangiisinillu nakkutiginninnermit inuit eqqaamiuusut aammalumi kikkut tamat sapinngisamik ilaatinneqassapput.

### *Avatangiisinut tunngatillugu upalungaarsimaneq*

Ajutoorujussuortoqartillugu avatangiisit innarlerneqangaatsiarsinnaasarput. Immami uuliaarluerneq annertoq avatangiisinut sivisuumik kinguneqarsinnaasarpoq. Aatsitassanik paaaffimmeersut tatsini katersorneqarsimasut saputit sequminnerisigut siaruarpata tamanna avatangiisinut eqqaaniittunut sivisuumik sunniuteqarsinnaasarpoq. Taakkua saniatigut piffissap sivisuup ingerlanerani pisartut annikitsut paasineqanngitsoortut imaluunniit iliuseqarfigineqanngitsut aamma avatangiisinut innarliisinnaasarput.

Suliaqartoqannginnerani pilersaarusiornikkut ajutoornerit pinngitsoortinniarneqassapput. Suliaqartoqalereersimappat, pilersaarusiornierup saniatigut nunap ilaani piffimmilu avatangiisinik nakkutiginnittoqassaaq. Pilersaarusiorniermi pingaaruteqarpoq aallaqqaataaniit avatangiisinut tunngatillugu upalungaarsimaneq naleqqussarluagaq suliarilluagarlu pigissallugu.

Aatsitassanut inatsimmi avatangiisinut akisussaaffinnut tunngasumi allassimavoq mingutsitsisoq akiliissasoq, tassanilu suliffeqarfik aatsitassarsiortoq akisussaasuusaaq.

Allaffissornikkut avatangiisinik malittarisassiortartut ineriartortinnissaannut avatangiisinullu tunngatillugu upalungaarsimanermut piumasaqaatinut anguniakkat ukuupput:

23. Teknologii ineriartortinneqarnerannut, mingutsitsinerup kingunerinut aamma avatangiisit innarlitsaaliorneqarneranni upalungaarsimanermut tunngatillugu nunat tamalaat akornanni ilisimatusarnerup aaqqissuussaasumik ingerlanneqarnissaata siuarsarnissaa.
24. Avatangiisinut tunngatillugu upalungaarsimanermut pissutsit pillugit oqaloqatigiinnerup attaveqaqatigiinnerullu siuarsarnissaa.

### **Killiffik: Piiasoqarunnaareerpat**

*Aatsitassanik piiasoqarunnaareerpat avatangiisit qanoq innerinik nakkutiginninneq*

Piiasoqarunnaareernerani avatangiisinik nakkutiginninnissamik Kalaallit Nunaata eqqummarinnini nunanut allanut sanilliulluni siuarsimassutigaa. Aatsitassanut inatsimmi malittarisassat allassimasut, suliaqartoqalinnginneranili piiaanerup unitsinneqareernerani pilersaarutit suliarineqarsimallutillu akuerineqarsimanissaat, nunat tamalaat akornanni periuseq atorpeqartoq

pitsaanerpaaq assigalugu ingerlanneqarpoq. Nakkutiginninnermi paasissutissat misilittakkallu pigineqalersut siunissami avatangiisit pillugit malittarisassiornermut nunatsinnilu pissutsinut naleqqussarnermut pingaaruteqartarput.

Anguniagaq suli unaavoq:

25. Piiasoqarunnaareernerani pisussat sapinngisamik siusissukkut eqqarsaatigereerneqarsimanissaat, aammalu aatsitassanik piiasoqarunnaareernerani avatangiisinik nakkutiginninnissap pilersaarusiorneqarnissaa.